

CHARTA DE VALORS DE L'ASSEMBLADA OCCITANA

occitan provençau

L'Assemblada Occitana es una associacion que vòu far liame entre leis actors que trabalhan per avidar la vida occitana e mai vòu èsser un ostau comun per aqueu mond. Ja que vòu recaptar lei valors que se pòdon exprimir dins aqueu teissut de vida puslèu qu'afortir aquelei que li serián pròprias, l'Assemblada Occitana s'empara sus un sòcle minim de valors partejadas.

I - **Respècte de la persona umana.** L'Assemblada Occitana es pas compatible amb leis ideologias que nègan lo prètz universau de la vida umana. Tota pensada, tot voler o tot fach de discriminacion, de negacion dei dreches umans, de racisme, de misoginia e d'omofobia non poirà pas ges èsser tolerats per l'Assemblada Occitana. Ja deuràn èsser extremats en defòra de l'associacion.

II - **Defensa de la libertat e de la democracia.** L'Assemblada Occitana es estacada de fons ai principis dei drechs collectius, a l'ideau democratic e ai libertats individualas e fundamentalas de la persona umana. Ges d'entrava a aquelei valors non serà pas tolerada dins l'associacion.

III - **Reconeissença d'una realitat occitana.** L'Assemblada Occitana es una associacion en lenga occitana per l'espelida de l'occitanitat (lei trachs lingüistics, culturaus o politics que pertòcan l'occitan). Aquelei que nègan o desconeiisson l'existéncia d'aquela occitanitat non trobaràn pas en l'Assemblada Occitana un ostau. E mai, ja que l'Assemblada Occitana recapta mai d'una concepcion de l'occitanitat, ela i vei un subjècte politic. E aquel engatjament politic es assumit per l'Assemblada Occitana.

IV - **Esperit de consens.** La pluralitat de sicaps e d'opinions, de còps lei bregas, son lo jòc normau d'un movement coma l'occitanisme e l'Assemblada Occitana o vòu pas negar. Totun, l'amira de l'Assemblada Occitana es d'ajudar au trabalh comun e a la convergéncia deis actors en favor de l'occitanitat. Per tant, es pas un luòc ont cauga agusar de diferéncias d'opinions mai un luòc de recèrca de consens. Non s'espèra pas que leis actors qu'intran dins l'Assemblada Occitana sigan d'acòrdi amb tot e amb totei leis autrei sòcis, sonque que respècten l'Assemblada Occitana coma escasença de s'encontrar e d'aprestar de projèctes comuns.

V - **Dobertura.** L'Assemblada Occitana vòu aculhir de mond d'originas diferentas e de còps tractar amb de gents estrangieras a l'occitanisme. Tolerància intèrna e pedagogia extèrna, si que son de valors nòstras.

VI - **Lo voler.** L'Assemblada Occitana vòu recaptar primier d'*actors* de l'occitanitat —mai se substituís pas a aqueleis actors— e espia vèrs l'accion. La fam d'obrar per la vida occitana es l'arsec que nos incita. Tot sòci de l'Assemblada Occitana participa ais enjòcs de societat segon lei sieunei capacitats e promòu tostemps lei valors de l'occitanisme.

VII - **Actitud.** Tot sòci de l'Assemblada Occitana se compòrta d'un biais respectuós e s'absten de tot acte immoral.

En signant aquesta charta, ieu sossignat/ada, _____
(nom d'ostau, prenom) m'engatgi a n'aplicar lo contengut. E siáu conscient/a qu'en cas de non-respècte de la charta, me pòdon prepausar de mesuras correctivas e pòdi far l'objècte d'una exclusion de l'Assemblada Occitana.

Luòc:

Data:

Signatura: